



Rabu, 12 Oktober 2022
Ogen: Kejadian 29:15-30



"Lea Ras Rahel"



Lea ras Rahel duana anak Laban, Lea anak sintua ras Rahel anak singuda. Mata Lea tuhu mejile; tapi potongan badan Rahel seh kal jilena (ay.17) janah duana jadi ndehara si Jakup. Aminna si tuhuna ngenan nge ate Jakup nandangi Rahel asangkan seninana Lea. Tapi erkiteken ibuali mamana Laban si Jakup, kedungenna Lea ras Rahel jadi ndeharana.

Perban ngenana ate Jakup si Rahel, la akapna ndekahsa nimai sa pitu tahun nari, rikutken perjanjianna ras mamana. I bas nimai e, Jakup pe isuruh erdahi tetap ras mamana alu la ndatken upah. Upahna e me kap Rahel banci jadi ndeharana. Pitu tahun la jadi soal man Jakup, tutus atena erdahin ras mamana gelahna banci ia erjabu ras Rahel si atena ngena. Paksa si pitu tahun nggo seh maka isingetken Jakup me kerna padan si nggo ibanna ras mamana. I bahan Laban me kerja erdemu bayu, itenahkenna kerina si biak man tenahenken guna kerja perjabun Jakup ras anakna. Kepeken itipu mamana me si Jakup, iberekenna anakna sintua Lea jadi ndeharana. Perbahanen mamana e erbahanca turah rawa ate bas pusuh Jakup. Tapi adi rawa e ngenca ibaba, banci la seh sura-sura. E maka ibahan Jakup me perpadanen peduakaliken ras mamana guna ndatken Rahel si atena ngena. Pitu tahun nari ka Jakub erdahin ras maman, bage pe labo akapna mberatsa. Kenca nggo seh pitu tahun, ipejabu Laban me Jakup ras Rahel. Tuhu labo banci seri perbahanen man dua ndehara, sada ate ngena sada lahang. Si e erbahanca lit persaingan ersenina; Ngenan ate Jakup man Rahel jadi senjatana erbahan mesui pusuh Lea. Tapi iidah Tuhan maka mesui ate Lea iban Rahel, e maka iban Tuhan Lea banci mupus janah Rahel lenga banci mupus. Gelah arah e, Lea ndatken keleng ate Jakup. Tuhan adil, iperdiatekenNa pusuh si itindes seninana, janah ibereNa dalam mulahisa.